

Augsburg, 26. November 1572

An Theodor Zwinger

UB Basel, Fr. Gr. I 11, fol. 140r.

S. Accepi tandem, diu desiderata Demosthenica et Isocratica V[ir] Cl[arissime], D[omine] et a[mice] colende: et è pristino typographico sum hoc tempore liberatus. Quod ut fieret: tua fidelis opera effectum esse non minima ex parte, et grato animo agnosco, et libens praedico. Sed de Theatri tui remuneratione liberali, nihil audire molestum est. D. Ostermannus Weitmoseros impulsu meo urbanè admonuit. Sed responsi nihil datum adhuc, cum, quin literas acceperint, non dubitet. O degeneres homines, et indignos tali honore, nisi magnificentiam erga te suam insigni honorario declararint. In quo vtinam tuam causam aequè feliciter possem agere, ac tu egisti meam. Sed et longè illi absunt, et me, ut opinor, nec de nomine norunt. Quare τῇ ἀδυναμίᾳ μου tua ignoscet humanitas: et studia mea atque debita officia perpetuò sibi parata esse, persuasum habeat velim. Vale. Augustae. 26 Nouembris Anno 1572.

Hiero[nymus] Wolfius
Tuus χρήσει καὶ κτήσει.

Tabellario ego satisfeci.